

■ BANCA CHANTUNALA E PRO SENECTUTE

Cussegliaziun da finanzas gratuita e nunlianta per senioras e seniors

(cp) La Banca Chantunala Grischuna (BCG) e Pro Senectute Grischun organiseschan il mars e l'avrigl curs gratuits davart l'ierta. Ultra da quai pon las senioras ed ils seniors sa laschar cussegliair durant l'entir onn nunliantamain d'in expert en dumondas da finanzas e da facultad. La Banca Chantunala Grischuna s'engascha activamain sco partenaria da Pro Senectute Grischun en favur da las senioras e dals seniors. Dapi il 2006 sustegna ella curs e cussegliaziuns e promova uschia l'indipendenza e la qualitad da viver en la vegliadetgna.

Curs gratuits davart l'ierta e davart il transferiment d'immobiglias

Las preparativas en connex cun la successiun d'ierta pertutgan tuts, saja quai per l'atgna protecziun finanziala u per il bainstar en la vegliadetgna. A maun d'in exempel concret illustrescha in expert da la Banca Chantunala Grischuna la repartiziun da la facultad tranter il conjugal ed ils descendents tenor il dretg da bains ed il dretg d'ierta ed explitgescha tge ch'ins sto tut resguardar en quest connex. Ils curs han lieu il mars e l'avrigl a Tusaun, Tavau, Landquart e Cuira. In'annunzia è necessaria, la participaziun è gratuita.

Detagls èn da chattar en il program da curs actual sin la pagina 28.

Cussegliaziun da finanzas per seniors – gratuita e nunlianta

In auter sectur d'engaschament da la BCG è la cussegliaziun da finanzas gratuita e nunlianta. *Arthur Soliva*, sez pensiunà ed anteriur cussegliaier da la Banca Chantunala Grischuna, dispona d'ina experientscha da blers onns ed enconuscha fitg bain las dumondas ed ils gi-

vischs dals seniors. El cusseglia persunas interessadas la mesemna ed il venderdi da las 14.00 fin a las 17.00 sut il numer da tel. 081 252 75 84 u via e-mail a finanzberatung@gr.pro-senectute.ch. Las cussegliaziuns personalas cumpiglian infurmaziuns generalas en connex cun ils daders e las finanzas, dumondas da la protecziun finanziala en la vegliadetgna u da l'optimaziun da la taglia.

Ulteriuras infurmaziuns dattan la Banca Chantunala Grischuna e Pro Senectute Grischun.



Senioras e seniors vulan passentar la saira da la vita senza quitads finansials.